



Komunikadu imprensa
Tribunal Distrital Dili

9 Outobru 2013

**Tribunál kondena pena prizaun tinan 20 ba kazu inestu;
Labarik fetu sira moris iha risku no la seguru mesmu iha sira nia uma laran
rasik**

Iha 8 Outobru 2013 Tribunál Distritál Dili prezide julgamentu leitura akordaun ba krime inestu no kondena arguidu ba tinan 20 iha prizaun tanba provadu komete abuzu seksuál ba menór ne'ebé nu'udar arguidu nia oan rasik. Pena ne'e akumulasaun husi krime iha konkursu ne'ebé arguidu komete dala sanolu resin neen hasoru vítima.

Tribunál konklui nia kondenasaun ne'e bazeia ba faktu provadu sira ne'ebé tribunál produs liu husi konfisaun arguidu nian, deklarasaun vítima nian no relatóriu mediku.

Ministériu Públiku akuza katak, arguidu prátika abuzu seksuál ba menór agravadu dala sanulu resin ne'en iha fulan Setembru to'o Dezembru 2012. Kada fulan arguidu halo relasaun seksuál ho lezada hamutuk dala haat. Arguidu sempre halo relasaun ne'e iha loron Sesta wainhira arguidu fila husi ninia servisu fatin.

Aktu ne'e rezulta vítima hetan isin rua no hahoris oan mane ida. Krime ne'e ho natureza violénsia doméstika no inestu tanba arguidu mak lezada nia aman rasik.

Relasiona ho aktu ne'e, Ministériu Públiku akuza arguidu ho artigu 177 Kódigu Penál kona-ba abuzu seksuál ba menór no artigu 182 alinea (d) Kódigu Penál kona-ba agravaun no artigu 35 kona-ba krime iha konkursu konjuga mós ho artigu 2 no 35 alinea (b) Lei Kontra Violénsia Doméstika.

“JSMP laran susar teb-tebes hodi hare katak minimu liu kada fulan, tribunál sira julga no kodena krime ho natureza inestu ne'ebé involve membru familia rasik; hanesan aman, aman hakiak ka relasaun familia besik sira seluk. Ne'e situasaun ida ne'e grave no ita nunka tolera atu hahalok sira hanesan ne'e kontinua eziste iha ita nia sociedade”, dehan Luis de Oliveira Sampaio, Diretór Ezekutivu JSMP.

Prátika inestu ne'e tipu krimé violasaun seksuál ne'ebé grave teb-tebes tanba envolve explorasaun pozisaun autóridade familiár nian no produz konsekuensia multi-aspetu ba vítima nia futuru kuandu la iha prosesu tratamentu no rekuperasaun sustentavel ba vítima.

“JSMP apresia no haksolok ho kondenasau ne'ebé tribunál sira hatun ba arguidu kazu inestu sira, maibe JSMP husu ema hotu atu kontribui hodi halo esforsu hotu ne'ebé posivel atu prevene krimé hanesan akontese iha futuru, liu-liu instituisaun estadu nian atu sensivel ho realidade ida ne'e.

Iha 18 no 20 Setembru JSMP JSMP mos observa julgamentu no kondenasau ba kazu inestu iha tribunál diferente rua; Tribunal Distritál Suai no Baucau ne'ebé kondena arguidu kazu inestu ba tinan 8 no tinan 18 prizaun. Ne'e hatudu faktu sosial ida katak ita nia sociedade iha problema ne'ebé serú teb-tebes, tanba labarik feto sira moris iha risku no la seguru, mesmu ne'e iha sira nia uma laran rasik, tenik Luis de Oliveira Sampaio, Diretór Ezekutivu JSMP.

Estadu tenke halo buat ruma hodi hapara krime ne'e no proteze sira ne'ebé vítima tanba sira kuaze ho idade menór wainhira krime akontese ba sira. Iha tinan 2012, JSMP rekomenda ona iha relatóriu ida kona-ba “INSESTU IHA TIMOR-LESTE: KRIME IDA NE'EBÉ LA HETAN REKOÑESIMENTU, atu dezenvolve politika lejislativu ida ne'ebé espesifiku no komprehensivu hodi hatan ba fenomena inestu iha Timor Leste.

JSMP preokupa ho reintegrasaun vítima ninia ba iha familia no comunidade, tanba agora ne'e dadauk vítima la iha ona inan ne'ebé atu tau matan ba nia no ninia bebe. Vítima agora ne'e dadauk hela iha uma mahon Fokupers maibé ne'e temporariu deit. JSMP fiar katak Governu iha ninia mekanizmu no responsabilidade atu tau matan ba vítima ne'ebé kbiit laek.

Kazu ne'e rejista ho Númeru Prosesu: 135/2013/TDD. Dr. Antoninho Goncalves representa juis kolektivu prezide julgamentu ne'e, Dr. Jacinto Babo Soares representa Ministériu Públiku no arguidu hetan defeza husi Dr. Manuel Amaral (Defensór Estajiadu) husi Eskritóriu Defensór Públiku.

Atu hetan informasaun kle'an liután favór kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone: 3323883 | 77295795
Website: www.jsmp.tl
Face book: www.facebook.com/timorleste.jsmp
Twitter: @JSMPTl